



**LAUGA A LE MINISITA I LE TATALAINA ALOAIA O LE OFISA AUTU E
FAAFOFOAINA MA FAAMAUTUINA AI NI PISINISI TAU FAATOAGA A SAMOA
(SAMOA AGRI BUSINESS INCUBATION CENTRE),
ASO FARAILE 06 SETEMA 2024, SROS NAFANUA.**

Susu Lau susuga i le Ta'ita'i o le Sauniga
Rev. Letupu Faauga Matautia,
Lau Afioga I le Minisita Lagolago,
Lau Afioga Maiava Fuimaono Tito Asafo,
Afifio a Tatou Pa'aga mo le Atina'e o Samoa
Aemaise le paia ma le mamalu o Samoa ua aofia potopoto e molimauina
le faamoemoe I le aso.

O lea ua ma'ea ona te'a sa ma faigā, aua lo tatou va tapuia ma lo tatou
Atua. O le mata'isau o le foafoaga, o le Silisili ese e mai lava i le vavau
se'ia o'o i le fa'avavau. E pei ona molia ai e lana auauna i lenei taeao.

Ae ou te fa'atulou i lenei taeao i le malu taue'e ua sasao ma aofia
potopoto mai, i o outou tofē ma itu taulagi, o itu fa'aleaganu'u ma pa'ia-
fa'alemalo. O pai'a aua Tama ma o latou Aiga, Aiga ma a latou Tama, Pule
ma Tumua, Itu'au ma le Alataua, Aiga i le tai ma le Va'a-o-fonoti.

O pa'ia sausau gata o Samoa e le taitai ona popo pe a'o fo'i i se
fa'amatalaga. Aua o pa'ia e tumau e leai se tautai e fia fagota sagolegole
i ai. Ae o le a lu'ulu'u atu ia i tulatoa ma le au fueloloa o le atunu'u aua o
le latou galuega tausisi ma le faivaalofilima lea.

Ae ua tatou potopoto mai, ona o le fa'amoemoe sa lupe, e pei o le fa'atalau'ula atu o le tatou Fa'alapotopotoga o Su'esu'ega Fa'asaienisi a Samoa (SROS). Ua lagona ai le agaga fa'agae'etia, ua me'eme'e fo'i ma osaosa le agaga ma le loto, aua ua tatou potopoto e tatala aloa'ia le Ofisa Autu e Fa'afofoaina ma Fa'amautuina ai ni Pisinisi tau-Fa'atoaga a Samoa (Samoa Agri Business Incubation Centre) fa'atasi ai ma le Tauvaga o Fuafuaga Fa'apisinisi o ni oloa fou e fa'apogai mai i Fa'atoaga a le Pasefika (Pacific Agri-Innovate Business Plan Competition).

O lenei Ofisa Autu o le a Fa'afofoaina ma Fa'amautuina ai ni pisinisi tau-Fa'atoaga (Agribusiness Incubator Centre), o se tasi o vaega autu o le poloketi ua ta'ua fa'apu'upu'uina o le STODAS, po'o le "Sustainable Transformation of Domestic Agrifood Systems". O lenei poloketi o lo'o fa'atupeina e le Iuni a Europa (European Union), ma o lo'o galulue so'oso'otau'au ai le SROS, le Matagaluega o Fa'atoaga ma Faiga Faiva, FAO ma le BAF (Business Assistance Fiji). O se poloketi o le a tele se aoga mo le lumanai manuia o Samoa, mai ni oloa gaosi tau-Fa'atoaga e fa'aoga ai ni metotia fou, o le tomai fa'aona po nei ma le fa'aogaina o le tekonoosi fou. O le a fesoasoani fo'i i le fa'amautuina o mea taumafa aua le fofoga taumafa a le atunu'u (Food Security) ma le tamaoaiga e maua mai e ala i fefa'atauaina atu i fafo o oloa tau-Fa'atoaga (Agricultural Exports).

O lo'o fa'alauiloa fo'i i le aso, le tatala aloa'ia ai, o le Tauvaga o Fuafuaga Fa'apisinisi o ni oloa e gaosia mai i puna'oa o fa'atoaga a le Pasefika po'o le "Pacific Agri-Innovate Business Plan Competition". O le i ai o se fuafuaga fa'apisinisi o se oloa (Business Plan), e taua tele mo le sologa manuia o se pisinisi. O lenei la tauvaga e aoga tele e fesoasoani ma fa'amalosia ai o tagata faipisinisi ina ia tapena ma silasila toto'a i ni fuafuaga lelei e manuia ai a tatou pisinisi. E maualuga i le manatu ma le lagona o le a toatele nisi o le a auai i lenei tauvaga aua e aoga tele e maua ai le tomai ma ni metotia fou aua lava le ola ma le manuia o pisinisi.

O le fa'amoemoe la i le asō, e pei ona tatou molimauina, le tatala aloaina ai o le Ofisa Autu mo le Fa'afoafoaina ma le Fa'amautuina o pisinisi tau-Fa'atoaga (Agribusiness Incubation Centre), fa'apea ai ma le Tauvaga o Fuafuaga Fa'apisinisi o ni oloa e gaosia mai i puna'oa o fa'atoaga a le Pasefika (Pacific Agri-Innovate Business Plan Competition), e famanatu ai se matatia taua ua ausia aua lava lo tatou naunautaiga ina ia tumati'e ma fa'aauau pea le lumanai manuia o Samoa e ala mai i Fa'atoaga. O lenei Ofisa Autu o le a lagolago e tapu'e ma fa'afailele le tomai fou, koloni ma fesoasoani i ni miti fou ina ia taunu'u ma le manuia e fa'apogai i le tofa fetala'i a le au faipisinisi po'o le afaifa'atoaga fo'i.

E fia fa'ailo le agaga fa'afetai i pa'aga uma, o e uma na fesoasoani ina ia taunu'u lenei fa'amoemoe. O le galulue so'oso'o tau'au ai o le SROS, MAF, FAO ma le BAF, fa'apea ai le fesoasoani mai a le EU o se molimau moni lea o le aoga ma le taua o faigapa'aga, ua mafua ai lenei fa'amoemoe e le ititi lona aoga. Ma o le tatalo, ia fa'aauau pea ia nei faigapa'aga i le lumana'i ina ia faaleleia atili ai tatou atina'e faatoaga ma oloa e gaosi mai i fua o faaeleeleaga, aua se manuia o tatou tagata.

Ma ou te fa'amalosia'u atu ai i ai tatou uma ua aofia mai e molimauina lenei fa'amoemoe i le asō, ina ia matua sailiili i ni metotia fou ma ia fa'asoa le toma'i. Aua ne'i tu'ua lenei avanoa e alu, ae ia fa'aoga tatau aua le fa'aleleia o le atina'eina o si o tatou o Samoa e ala i oloagaosi e afua mai i fa'atoaga.

Tatou matua galulue fa'atasi, aua se lumanai manuia o Samoa e ala mai i fa'atoaga ma ona oloa gaosi, mo nei ma a taeao.

Ona fa'ata'i lea o se fa'amatalaga, ia fa'amanuia tele le Atua i tualumaga o lenei aso. Le mamalu o Samoa ua potopoto fa'apea fo'i a tatou pa'aga ua tatou fa'atasi, ia i ai pea fa'amanuiaga ma le filemu o le Atua ia i tatou uma.

Soifua ma ia manuia.